

漢書門類			
四	二	八	七
號	函	架	冊
二	九	二	一

內閣文庫			
漢	四	二	八
書	號	冊	架
類	二	九	二
函	一	三	三

內閣文庫	
番號	漢 4287
冊數	12 (9)
函號	274 159

九

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

C Y M

© Kodak, 2007 TM: Kodak



春秋左傳

昭公中

九年春叔弓會楚子于陳

九年春叔弓宋華亥鄭游吉衛趙戩會楚子于陳

許遷于夷

二月庚申楚公子弃疾遷許于夷實城父取州來淮北之田以益之伍舉授許男田然丹遷城父人於陳以夷濮西田益之遷方城外入于許

辭命帶議論

規模正大而語亦勁淨

此語絕工隋然在今時亦以為陳

○周甘人與晉閻嘉爭閻田晉梁丙張趯率陰戎伐潁王使詹桓伯辭於晉曰我自夏以后稷魏駘芮岐畢吾西土也及武王克商蒲姑商奄吾東土也巴濮楚鄧吾南土也肅慎燕亳吾北土也吾何邇封之有文武成康之建母弟以蕃屏周亦其廢隊是為豈如弁髦而因以敝之先王居櫛杙于四裔以禦螭魅故允姓之姦居于瓜州伯父惠公歸自秦而誘以來使偪我諸姬入我郊甸則戎焉取之戎有中國誰之咎也后稷

封殖天下今戎制之不亦難乎伯父圖之我在伯父猶衣服之有冠冕木水之有本原民人之有謀主也伯父若裂冠毀冕拔本塞源專弃謀主雖戎狄其何有余一人叔向謂宣子曰文之伯也豈能改物翼戴天子而加之以共自文以來世有衰德而暴滅宗周以宣示其侈諸侯之貳不亦宜乎且王辭直子其圖之宣子說王有姻喪使趙成如周弔且致閻田與祿反潁俘王亦使賓滑執甘大夫襄以說於晉晉人禮而歸

春秋左傳

之

夏四月陳災

夏四月陳災鄭裨竈曰五年陳將復封封五十二年而遂亡子產問其故對曰陳水屬也火水妃也而楚所相也今火出而火陳逐楚而建陳也妃以五成故曰五年歲五及鶉火而後陳卒亡楚克有之天之道也故曰五十二年

○晉荀盈如齊逆女還六月卒于戲陽殯于絳未葬晉侯飲酒樂膳宰屠蒯趨入請佐公使尊許

昔人謂叔申主事左傳不

如禮考然彼猶可相伯仲此章則真不如遠甚

此兩段頂針排語益可厭

迂

之而遂酌以飲工曰女為君耳將司聰也辰在子卯謂之疾日君徹宴樂學人舍業為疾故也君之卿佐是謂股肱股肱或虧何痛如之女不聞而樂是不聰也又飲外嬖嬖叔曰女為君目將司明也服以旌禮禮以行事事有其物物有其容今君之容非其物也而女不見是不明也亦自飲也曰味以行氣氣以實志志以定言言以出令臣實司味二御失官而君弗命臣之罪也公說徹酒初公欲廢知氏而立其外嬖為是

春秋左傳昭公中

春秋左傳

悛而止秋八月使荀躒佐下軍以說焉

秋仲孫矍如齊

孟僖子如齊殷聘禮也

冬築郎囿

冬築郎囿書時也季平子欲其速成也叔孫昭

子曰詩曰經始勿亟庶民子來焉用速成其以

勦民也無囿猶可無民其可乎

十年春王正月

○十年春王正月有星出于婺女鄭裨竈言於子

產曰七月戊子晉君將死今茲歲在顓頊之虛

姜氏任氏實守其地居其維首而有妖星焉告

邑姜也邑姜晉之妣也天以七紀戊子逢公以

登星斯於是乎出吾是以譏之

夏齊欒施來奔

齊惠欒高氏皆耆酒信內多怨彊於陳鮑氏而

惡之夏有告陳桓子曰子旗子良將攻陳鮑亦

告鮑氏桓子授甲而如鮑氏遭子良醉而騁遂

見文子則亦授甲矣使視二子則皆將飲酒桓

亦有境然未
曲盡情態

春秋左傳 昭公中

子曰彼雖不信聞我授甲則必逐我及其飲酒也先伐諸陳鮑方睦遂伐欒高氏子良曰先得公陳鮑焉往遂伐虎門晏平仲端委立于虎門之外四族召之無所往其徒曰助陳鮑乎曰何善焉助欒高乎曰庸愈乎然則歸乎曰君伐焉歸公召之而後入公卜使王黑以靈姑鉅率吉請斷三尺焉而用之五月庚辰戰于稷欒高敗又敗諸莊國人追之又敗諸鹿門欒施高彊來奔陳鮑分其室晏子謂桓子必致諸公讓德之

戰事不詳

此下碎叙亦錯落不板其邑與之互變前句

主也讓之謂懿德凡有血氣皆有爭心故利不可強思義為愈義利之本也頌、性、句蒞乎可以滋長桓子盡致諸公而誦老于莒桓子召子山私具幄幕器用從者之衣屨而反棘焉子商亦如之而反其邑子周亦如之而與之夫于反子城子公公孫捷而皆益其祿凡公子公孫之無祿者私分之邑國之貧約孤寡者私與之粟曰詩云陳錫載周能施也桓公是以霸公與桓子莒之旁邑辭穆孟姬為之請高唐陳

氏始大

秋七月季孫意如叔弓仲孫釁帥師伐莒

秋七月平子伐莒取郟獻俘始用人於亳社臧

武仲在齊聞之曰周公其不饗魯祭乎周公饗

義魯無義詩曰德音孔昭視民不佻佻之謂甚

矣而壹用之將誰福哉

戊子晉侯彪卒

戊子晉平公卒鄭伯如晉及河晉人辭之游吉

遂如晉

九月叔孫婁如晉葬晉平公

九月叔孫婁齊國弱宋華定衛北宮喜鄭罕虎

許人曹人莒人邾人滕人薛人杞人小邾人如

晉葬平公也鄭子皮將以幣行子產曰喪焉用

幣用幣必百兩百兩必千人千人至將不行不

行必盡用之幾千人而國不亡子皮固請以行

既葬諸侯之大夫欲因見新君叔孫昭子曰非

禮也弗聽叔向辭之曰大夫之事畢矣而又命

孤孤斬焉在衰經之中其以嘉服見則喪禮未

意婉盡

畢其以喪服見是重受弔也大夫將若之何皆無辭以見子皮盡用其幣歸謂子羽曰非知之實難將在行之夫子知之矣我則不足書曰欲敗度縱敗禮我之謂矣夫子知度與禮矣我實縱欲而不能自克也昭子至自晉大夫皆見高彊見而退昭子語諸大夫曰為人子不可不慎也哉昔慶封亡子尾多受邑而稍致諸君君以為忠而甚寵之將死疾于公宮輦而歸君親推之其子不能任是以在此忠為令德其子弗能

不甚工

任罪猶及之難不慎也喪夫人之力弃德曠宗以及其身不亦害乎詩曰不自我先不自我後其是之謂乎

十有二月甲子宋公成卒

冬十二月宋平公卒初元公惡寺人柳欲殺之及喪柳熾炭于位將至則去之比葬又有寵

十有一年春王二月叔弓如宋葬宋平公

十一年春王二月叔弓如宋葬平公也

夏四月丁巳楚子虔誘蔡侯般殺之于申楚公子

事可記

弃疾帥師圍蔡

景王問於萇弘曰今茲諸侯何實吉何實凶對曰蔡凶此蔡侯般弑其君之歲也歲在豕韋弗過此矣楚將有之然壅也歲及大梁蔡復楚凶天之道也楚子在申召蔡靈侯靈侯將往蔡大夫曰王貪而無信唯蔡於感今幣重而言甘誘我也不如無往蔡侯不可三月丙申楚子伏甲而饗蔡侯於申醉而執之夏四月丁巳殺之刑其士七十人公子弃疾帥師圍蔡韓宣子問於

論亦勁暢然
未極精婉之
致

不甚快

叔向曰楚其克乎對曰克哉蔡侯獲罪於其君而不能其民天將假手於楚以斃之何故不克然胥聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其國雖幸而克必受其咎弗能久矣桀克有緡以喪其國紂克東夷而隕其身楚小位下而亟暴於二王能無咎乎天之假助不善非祚之也厚其凶惡而降之罰也且譬之如天其有五材而將用之力盡而敝之是

以無拯不可沒振

五月甲申夫人歸氏薨大蒐于比蒲

五月齊歸薨大蒐于比蒲非禮也

仲孫獲會邾子盟于禳祥

孟僖子會邾莊公盟于禳祥脩好禮也泉丘人

有女夢以其帷幕孟氏之廟遂奔僖子其僚從

之盟于清丘之社曰有子無相弃也僖子使助

遠氏之造反自禳祥宿于遠氏生懿子及南宮

敬叔於泉丘人其僚無子使字敬叔

亦小有致

秋季叔意如會晉韓起齊國弱宋華亥衛北宮佗

鄭罕虎曹人杞人于厥憇

楚師在蔡晉荀吳謂韓宣子曰不能救陳又不

能救蔡物以無親晉之不能亦可知也已為盟

主而不恤亡國將焉用之秋會于厥憇謀救蔡

也鄭子皮將行子產曰行不遠不能救蔡也蔡

小而不順楚大而不德天將弃蔡以壅楚盈而

罰之蔡必亡矣且喪君而能守者鮮矣三年王

其有咎乎美惡周必復王惡周矣晉人使狐父

意畧具語不甚精

請蔡于楚弗許

迂而之裁

○單子會韓宣子于戚視下言徐叔向日單子其將死乎朝有著定會有表衣有禴帶有結會朝之言必聞于表著之位所以昭事序也視不過結禴之中所以道容貌也言以命之容貌以明之失則有關今單子為王官伯而命事於會視不登帶言不過步貌不道容而言不昭矣不道不共不昭不從無守氣矣

九月己亥葬我小君齊歸

率

九月葬齊歸公不感晉士之送葬者歸以語史趙史趙曰必為魯郊侍者曰何故曰歸姓也不思親祖不歸也叔向日魯公室其卑乎君有大喪國不廢蒐有三年之喪而無一日之感國不恤喪不忌君也君無感容不顧親也國不忌君君不顧親能無卑乎殆其失國

冬十有一月丁酉楚師滅蔡執蔡世子有以歸用之

冬十一月楚子滅蔡用隱天子于岡山申無宇

曰不祥五牲不相為用況用諸侯乎王必悔之
○十二月單成公卒

○楚子城陳蔡不羹使弃疾為蔡公王問於申無
宇曰弃疾在蔡何如對曰擇子莫如父擇臣莫
如君鄭莊公城櫟而寘子元焉使昭公不立齊
桓公城穀而寘管仲焉至于今賴之臣聞五大
不在邊五細不在庭親不在外羈不在內今弃
疾在外鄭丹在內君其少戒王曰國有大城何
如對曰鄭京櫟實殺曼伯宋蕭亳實殺子游齊

用事多肉不
勝骨

渠丘實殺無知衛蒲戚實出獻公若由是觀之
則害於國未大必折尾大不掉君所知也

十有二年春齊高偃帥師納北燕伯于陽

十二年春齊高偃納北燕伯款于唐因其眾也

三月壬申鄭伯嘉卒

三月鄭簡公卒將為葬除及游氏之廟將毀焉
子大叔使其除徒執用以立而無庸毀曰子產
過女而問何故不毀乃曰不忍廟也諾將毀矣
既如是子產乃使辟之司墓之室有當道者毀

曲盡意狀

之則朝而崩弗毀則日中而崩子大叔請毀之
曰無若諸侯之賓何子產曰諸侯之賓能來會
吾喪豈憚日中無損於賓而民不害何故不為
遂弗毀日中而葬君子謂子產於是乎知禮禮
無毀人以自成也

夏宋公使華定來聘

夏宋華定來聘通嗣君也公享之為賦蓼蕭弗
知又不荅賦昭子曰必亡宴語之不懷寵光之
不宣令德之不知同福之不受將何以在

公如晉至河乃復

齊侯衛侯鄭伯如晉朝嗣君也公如晉至河乃
復取鄭之役莒人愬于晉晉有平公之喪未之
治也故辭公公子懋遂如晉晉侯享諸侯子產
相鄭伯辭於享請免喪而後聽命晉人許之禮
也晉侯以齊侯宴中行穆子相投壺晉侯先穆
子曰有酒如淮有肉如坻寡君中此為諸侯師
中之齊侯舉矢曰有酒如澗有肉如陵寡人中
此與君代興亦中之伯瑕謂穆子曰子失辭吾

戲語却工

固師諸侯矣。壺何爲焉。其以中雋也。齊君弱。吾君歸弗來矣。穆子曰。吾軍帥彊禦。卒乘競勸。今猶古也。齊將何事。公孫佻趨進曰。日旰君勤。可以出矣。以齊侯出。

五月葬鄭簡公

六月葬鄭簡公

楚殺其大夫成熊

楚子謂成虎若敖之餘也。遂殺之。或譖成虎於楚子。成虎知之而不能行。書曰。楚殺其大夫成

虎懷寵也

秋七月

○晉荀吳僞會齊師者。假道於鮮虞。遂入昔陽。秋八月壬午。滅肥。以肥子緜臯歸。

○周原伯綏虐其輿臣。使曹逃。冬十月壬申。朔原輿人逐綏而立公子跪。尋綏奔郊。

○甘簡公無子。立其弟過。過將去。成景之族。成景之族賂劉獻公。丙申。殺甘悼公而立成公之孫鱣。丁酉。殺獻太子之傅庾皮之子過。殺瑕辛于

市及宮嬖綽王孫沒劉州鳩陰忌老陽子

冬十月公子愁出奔齊

季平子立而不禮於南蒯南蒯謂子仲吾出季氏而歸其室於公子更其位我以費為公臣子仲許之南蒯語叔仲穆子且告之故季悼子之卒也叔孫昭子以再命為卿及平子伐莒克之更受三命叔仲子欲構二家謂平子曰三命踰父兄非禮也平子曰然故使昭子昭子曰叔孫氏有家禍殺適立庶故姑也及此若因禍以斃

叙瑣事亦入細第尚未腴鍊

似謠似誦

之則聞命矣若不廢君命則固有著矣昭子朝而命吏曰姑將與季氏訟書辭無頗季孫懼而歸罪於叔仲子故叔仲小南蒯公子愁謀季氏愁告公而遂從公如晉南蒯懼不克以費叛如齊子仲還及衛聞亂逃介而先及郊聞費叛遂奔齊南蒯之將叛也其鄉人或知之過之而歎且言曰恤恤乎湫乎攸乎深思而淺謀邇身而遠志家臣而君圖有人矣哉南蒯枚筮之遇坤☷之比☷曰黃裳元吉以為大吉也示子服惠

論易排白疊
承自是左氏
常套

伯曰即欲有事何如惠伯曰吾嘗學此矣忠信
之事則可不然必敗外疆內溫忠也和以率貞
信也故曰黃裳元吉黃中之色也裳下之飾也
元善之長也中不忠不得其色下不共不得其
飾事不善不得其極外內倡和為忠率事以信
為共供養三德為善非此三者弗當且夫易不
可以占險將何事也且可飾乎中美能黃上美
為元下美則裳參成可筮猶有闕也筮雖吉未
也將適費飲鄉人酒鄉人或歌之曰我有圃生

繁而不簡亦
太直乏風致

三節將順未出
諷諫中間更襟
有襯帖構法儘
完淨死如一篇
序記文字
此等閒叙若
無緊要然粧
點濃色正在

之杞乎從我者子乎去我者鄙乎倍其鄰者恥
乎已乎已乎非吾黨之士乎平子欲使昭子逐
叔仲小小聞之不敢朝昭子命吏謂小待政於
朝曰吾不為怨府

楚子伐徐

楚子狩于州來次于潁尾使蕩侯潘子司馬督
蹠尹午陵尹喜帥師圍徐以懼吳楚子次于乾
谿以為之援雨雪王皮冠秦復陶翠被豹舄執
鞭以出僕析父從右尹子革夕王見之去冠被

此
雍容有韻

舍鞭與之語曰昔我先王熊繹與呂伋王孫牟
燮父禽父並事康王四國皆有分我獨無有今
吾使人於周求鼎以為分王其與我乎對曰與
君王哉昔我先王熊繹辟在荆山篳路藍縷以
處草莽跋涉山林以事天子唯是桃弧棘矢以
共禦王事齊王舅也晉及魯衛王母弟也楚是
以無分而彼皆有今周與四國服事君王將唯
命是從豈其愛鼎王曰昔我皇祖伯父昆吾舊
許是宅今鄭人貪賴其田而不我與我若求之

兩語簡峭

其與我乎對曰與君王哉周不愛鼎鄭敢愛田
王曰昔諸侯遠我而畏晉今我大城陳蔡不羹
賦皆千乘子與有勞焉諸侯其畏我乎對曰畏
君王哉是四國者專足畏也又加之以楚敢不
畏君王哉工尹路請曰君王命剝圭以為鉞秘
敢請命王入視之析父謂子革吾子楚國之望
也今與王言如響國其若之何子革曰摩厲以
須王出吾刃將斬矣王出復語左史倚相趨過
王曰是良史也子善視之是能讀三墳五典八

四句頓挫拋
擲
入此間語乃
更覺增態

峭句

轉下無痕

工妙

索九丘對曰臣嘗問焉昔穆王欲肆其心周行天下將皆必有車轍馬跡焉祭公謀父作祈招之詩以止王心王是以獲沒於祗宮臣問其詩而不知也若問遠焉其焉能知之王曰子能乎對曰能其詩曰祈招之悒悒式昭德音思我王度式如玉式如金形民之力而無醉飽之心王揖而入饋不食寢不寐數日不能自克以及於難仲尼曰古也有志克己復禮仁也信善哉楚靈王若能如是豈其辱於乾谿

晉伐鮮虞

晉伐鮮虞因肥之役也

十有三年春叔弓帥師圍費

十三年春叔弓圍費弗克敗焉平子怒令見費人執之以為囚俘冶區夫曰非也若見費人寒者衣之饑者食之為之令主而共其乏困費來如歸南氏亡矣民將叛之誰與居邑若憚之以威懼之以怒民疾而叛為之聚也若諸侯皆然費人無歸不親南氏將焉入矣平子從之費人

意好以鍊句
見致第微傷
繁且亦嫌四
字向多

叛南氏

夏四月楚公子比自晉歸于楚弑其君虔于乾谿
楚公子弃疾殺公子比

楚子之為令尹也殺大司馬遠掩而取其室及
即位奪遠居田遷許而質許圍蔡洧有寵於王
王之滅蔡也其父死焉王使與於守而行申之
會越大夫戮焉王奪鬪韋龜中犖又奪成然邑
而使為郊尹蔓成然故事蔡公故遠氏之族及
遠居許圍蔡洧蔓成然皆王所不禮也因羣喪

攢事因以攢事
瑞所由起左氏
每擅此長而此
董尤錯落有節
委且字句俱淨
又出之自然不
費力尤為妙

腰束

情狀曲盡妙

意常但以鍊
語妙

職之族啟越大夫常壽過作亂圍固城克息舟
城而居之觀起之死也其子從在蔡事朝吳曰
今不封蔡蔡不封矣我請試之以蔡公之命召
子干子皙及郊而告之情強與之盟入襲蔡蔡
公將食見之而逃觀從使子干食坎用牲加書
而速行已徇於蔡曰蔡公召二子將納之與之
盟而遣之矣將師而從之蔡人聚將執之辭曰
失賊成軍而殺余何益乃釋之朝吳曰二三子
若能死亡則如違之以待所濟若求安定則如

與之以濟所欲且違上何適而可衆曰與之乃奉蔡公召二子而盟于鄧依陳蔡人以國楚公子比公子黑肱公子弃疾蔓成然蔡朝吳帥陳蔡不羹許葉之師因四族之徒以入楚及郊陳蔡欲爲名故請爲武軍蔡公知之曰欲速且役病矣請藩而已乃藩爲軍蔡公使須務牟與史弭先入因正僕人殺大子祿及公子罷敵公子比爲王公子黑肱爲令尹次于魚陂公子弃疾爲司馬先除王宮使觀從從師于乾谿而遂告

三波
之且曰先歸復所後者剽師及訾梁而潰王聞羣公子之死也自投于車下曰人之愛其子也亦如余乎侍者曰甚焉小人老而無子知擠于溝壑矣王曰余殺人子多矣能無及此乎右尹子革曰請待于郊以聽國人王曰衆怒不可犯也曰若入於大都而乞師於諸侯王曰皆叛矣曰若亡於諸侯以聽大國之圖君也王曰大福不再祗取辱焉然丹乃歸于楚王治夏將欲入鄢芋尹無宇之子申亥曰吾父再奸王命王弗

誅惠孰大焉君不可忍惠不可弃吾其從王乃
求王遇諸棘圍以歸夏五月癸亥王縊于芋尹
申亥氏申亥以其二女殉而葬之觀從謂子干
曰不殺弃疾雖得國猶受禍也子干曰余不忍
也子玉曰人將忍子吾不忍侯也乃行國每夜
駭曰王入矣乙卯夜弃疾使周走而呼曰王至
矣國人大驚使蔓成然走告子干子皙曰王至
矣國人殺君司馬將來矣君若早自圖也可以
無辱衆怒如水火焉不可為謀又有呼而走至

寫情狀踴躍

者曰衆至矣二子皆自殺丙辰弃疾即位名曰
熊居葬子干于訾實訾敖殺囚衣之王服而流
諸漢乃取而葬之以靖國人使子旗為令尹楚
師還自徐吳人敗諸豫章獲其五帥平王封陳
蔡復遷邑致羣賂施舍寬民宥罪舉職召觀從
王曰唯爾所欲對曰臣之先佐開卜乃使為卜
尹使枝如子躬聘于鄭且致犢櫟之田事畢弗
致鄭人請曰聞諸道路將命寡君以犢櫟敢請
命對曰臣未聞命既復王問犢櫟降服而對曰

亦是豫提完

靈王妄念

五子神兆

精簡有致

臣過失命未之致也。王執其手曰：子毋勤。姑歸。不穀有事，其告子也。他年，芋尹申亥以王柩告，乃改葬之。初，靈王卜曰：余尚得天下，不吉。投龜，詎天而呼曰：是區區者，而不余畀，余必自取之。民患王之無厭也，故從亂如歸。初，共王無冢，適有寵子五人，無適立焉。乃大有事于羣望而祈，曰：請神擇於五人者，使主社稷。乃徧以璧見於羣望，曰：當璧而拜者，神所立也。誰敢違之？既乃與巴姬密埋璧於大室之庭，使五人齊而長入。

單論子干兼及平王

排而不精與國語相近

拜康王跨之，靈王肘加焉。子干、子皙皆遠之。平王弱，抱而入，再拜皆厭。紐鬪韋龜屬成，然焉。且曰：弃禮違命，楚其危哉！子干歸，韓宣子問於叔向曰：子干其濟乎？對曰：難。宣子曰：同惡相求，如市賈焉，何難？對曰：無與同好，誰與同惡？取國有五難：有寵而無人，一也；有人而無主，二也；有主而無謀，三也；有謀而無民，四也；有民而無德，五也。子干在晉十三年矣，晉楚之從，不聞達者，可謂無人。族盡親叛，可謂無主。無釁而動，可謂無

謀為羈終世可謂無民亡無愛徵可謂無德王
虐而不忌楚君子干涉五難以弑舊君誰能濟
之有楚國者其弃疾乎君陳蔡城外屬焉苛慝
不作盜賊伏隱私欲不違民無怨心先神命之
國民信之芊姓有亂必季實立楚之常也獲神
一也有民二也令德三也寵貴四也居常五也
有五利以去五難誰能害之子干之官則右尹
也數其貴寵則庶子也以神所命則又遠之其
貴亡矣其寵弃矣民無懷焉國無與焉將何以

不甚淨鍊

立宣子曰齊桓晉文不亦是乎對曰齊桓衛姬
之子也有寵於僖有鮑叔牙賓須無隰朋以為
輔佐有莒衛以為外主有國高以為內主從善
如流下善齊肅不藏賄不從欲施舍不倦求善
不厭是以有國不亦宜乎我先君文公狐季姬
之子也有寵於獻好學而不貳生十七年有士
五人先大夫子餘子犯以為腹心有魏犢賈
佗以為股肱有齊宋秦楚以為外主有欒卻狐
先以為內主亡十九年守志彌篤惠懷弃民民

從而與之獻無異親民無異望天方相晉將何以代文此二君者異於子干共有寵子國有與主無施於民無援於外去晉而不送歸楚而不逆何以冀國

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘八月甲戌同盟于平丘公不與盟晉人執季孫意如以歸公至自會

叙事亦詳核但不甚精嚴

晉成虎祁諸侯朝而歸者皆有貳心為取鄭故

示威

晉將以諸侯來討叔向曰諸侯不可以不示威

吳辭

乃竝徵會告于吳秋晉侯會吳子于良水道不可吳子辭乃還七月丙寅治兵于邾南甲車四千乘羊舌鮒攝司馬遂合諸侯于平丘子產子

子產太叔二人事夾帶叙

大叔相鄭伯以會子產以幄幕九張行子大叔

虐衛

以四十既而悔之每舍損焉及會亦如之次于衛地叔鮒求貨於衛淫芻蕘者衛人使屠伯饋

叔向羹與一篋錦曰諸侯事晉未敢攜貳况衛在君之宇下而敢有異志芻蕘者異於他日敢

反璧事今日
用之已陳奈
何未有用反
錦者

劫齊

語常

請之叔向受羹反錦曰晉有羊舌鮒者瀆貨無
厭亦將及矣爲此役也子若以君命賜之其已
客從之未退而禁之晉人將尋盟齊人不可晉
侯使叔向告劉獻公曰抑齊人不盟若之何對
曰盟以底信君苟有信諸侯不貳何患焉告之
以文辭董之以武師雖齊不許君庸多矣天子
之老請帥王賦元戎十乘以先啟行遲速唯君
叔向告于齊曰諸侯求盟已在此矣今君弗利
寡君以爲請對曰諸侯討貳則有尋盟若皆用

迂而排殊可
厭

命何盟之尋叔向曰國家之敗有事而無業事
則不經有業而無禮經則不序有禮而無威序
則不共有威而不昭共則不明不明弃共百事
不終所由傾覆也是故明王之制使諸侯歲聘
以志業閒朝以講禮再朝而會以示威再會而
盟以顯昭明志業於好講禮於等示威於衆昭
明於神自古以來未之或失也存亡之道恒由
是興晉禮主盟懼有不治奉承齊犧而布諸君
求終事也君曰余必廢之何齊之有唯君圖之

辭命

春秋左傳昭公中

示衆

辭魯

辭命

寡君聞命矣齊人懼對曰小國言之大國制之
敢不聽從既聞命矣敬共以往遲速唯君叔向
曰諸侯有聞矣不可以不示衆八月辛未治兵
建而不旆壬申復旆之諸侯畏之邾人莒人愬
于晉曰魯朝夕伐我幾亡矣我之不共魯故之
以晉侯不見公使叔向來辭曰諸侯將以甲戌
盟寡君知不得事君矣請君無勤子服惠伯對
曰君信蠻夷之訴以絕兄弟之國弃周公之後
亦唯君寡君聞命矣叔向曰寡君有甲車四千

窮辭欠占地
步然却說得

實

氣勁

又帶叙二人
事

鄭競

亦淨

乘在雖以無道行之必可畏也況其率道其何
敵之有牛雖瘠償於豚上其畏不死南蒯子仲
之憂其庸可弃乎若奉晉之衆用諸侯之師因
邾莒杞鄆之怒以討魯罪閒其二憂何求而弗
克魯人懼聽命甲戌同盟于平丘齊服也令諸
侯日中造于除癸酉退朝子產命外僕速張於
除子大叔止之使待明日及夕子產聞其未張
也使速往乃無所張矣及盟子產爭承曰昔天
子班貢輕重以列列尊貢重周之制也卑而貢

行理即行李

爭半日語必
多何為止記
此二十餘句
得晉人答語
再添一層爭
論乃更濃
執魯卿

重者甸服也鄭伯男也而使從公侯之貢懼弗
給也敢以為請諸侯靖兵好以為事行理之命
無月不至貢之無藝小國有闕所以得罪也諸
侯脩盟存小國也貢獻無極亡可待也存亡之
制將在今矣自日中以爭至于昏晉人許之既
盟子大叔咎之曰諸侯若討其可瀆乎子產曰
晉政多門貳偷之不暇何暇討國不競亦陵何
國之為公不與盟晉人執季孫意如以幕蒙之
使狄人守之司鐸射懷錦奉壺飲冰以蒲伏焉

又帶叙子產

守者御之乃與之錦而入晉人以平子歸子服
湫從子產歸未至聞子皮卒哭且曰吾已無為
為善矣唯夫子知我仲尼謂子產於是行也足
以為國基矣詩曰樂旨君子邦家之基子產君
子之求樂者也且曰合諸侯藝貢事禮也
○鮮虞人聞晉師之悉起也而不警邊且不脩備
晉荀吳自著雍以上軍侵鮮虞及中人驅衝競
大獲而歸

蔡侯廬歸于蔡陳侯吳歸于陳

春秋左傳 昭公中

楚之滅蔡也靈王遷許胡沈道房申於荆焉平
王卽位旣封陳蔡而皆復之禮也隱大子之子
廬歸于蔡禮也悼大子之子吳歸于陳禮也

冬十月葬蔡靈公

冬十月葬蔡靈公禮也

公如晉至河乃復

公如晉荀吳謂韓宣子曰諸侯相朝講舊好也
執其卿而朝其君有不好焉不如辭之乃使士
景伯辭公于河

吳滅州來

吳滅州來令尹子旗請伐吳王弗許曰吾未撫
民人未祀鬼神未脩守備未定國家而用民力
敗不可悔州來在吳猶在楚也子姑待之

○季孫猶在晉子服惠伯私於中行穆子曰魯事
晉何以不如夷之小國魯兄弟也土地猶大所
命能具若爲夷弃之使事齊楚其何瘳於晉親
親與大賞共罰否所以爲盟主也子其圖之諺
曰臣一主二吾豈無大國穆子告韓宣子且曰

意精深

楚滅陳蔡不能救而為夷執親將焉用之乃歸季孫惠伯曰寡君未知其罪合諸侯而執其老若猶有罪死命可也若曰無罪而惠免之諸侯不聞是逃命也何免之為請從君惠於會宣子患之謂叔向曰子能歸季孫乎對曰不能鮒也能乃使叔魚叔魚見季孫曰昔鮒也得罪於晉君自歸於魯君微武子之賜不至於今雖獲歸骨於晉猶子則肉之敢不盡情歸子而不歸鮒也聞諸吏將為子除館於西河其若之何且泣

精隋之甚

平子懼先歸惠伯待禮

十有四年春意如至自晉

十四年春意如至自晉尊晉罪已也尊晉罪已禮也

○南蒯之將叛也盟費人司徒老祁慮癸偽癆疾使請於南蒯曰臣願受盟而疾興若以君靈不死請待閒而盟許之二子因民之欲叛也請朝衆而盟遂劫南蒯曰羣臣不忘其君畏子以及今三年聽命矣子若弗圖費人不忍其君將不

精隋

文勢流動已
近戰國第意

春秋左傳 昭公中

致微婉則左
氏

能畏子矣。子何所不逞。欲請送子。請期五日。遂奔齊。侍飲酒於景公。公曰：「叛夫對曰：臣欲張公室也。」子韓皙曰：「家臣而欲張公室，罪莫大焉。」司徒老祁慮癸來歸費，齊侯使鮑文子致之。

三月曹伯滕卒

夏四月

○夏，楚子使然丹簡上國之兵於宗丘，且撫其民，分貧振窮，長孤幼，養老疾，收介特，救災患，宥孤寡，赦罪戾，詰姦慝，舉淹滯，禮新叙舊，祿勲合親。

每叙新政必用排三字句亦覺太套且此調法原亦

不甚佳

任良物官，使屈罷簡東國之兵於召陵，亦如之。好於邊疆，息民五年而後用師，禮也。

秋葬曹武公

八月莒子去疾卒

秋八月，莒著丘公卒，郊公不感，國人弗順，欲立著丘公之弟庚與。蒲餘侯惡公子意恢而善於庚與，郊公惡公子鐸而善於意恢。公子鐸因蒲餘侯而與之謀，曰：「爾殺意恢，我出君而納庚與。」許之。

春秋左傳 昭公中

○楚令尹子旗有德於王不知度與養氏比而求無厭王患之九月甲午楚子殺鬬成然而滅養氏之族使鬬辛居郢以無忘舊勲冬莒殺其公子意恢

冬十二月蒲餘侯茲夫殺莒公子意恢郊公奔齊公子鐸逆庚與於齊齊隰黨公子鉏送之有賂田

○晉邢侯與雍子爭鄙田久而無成士景伯如楚叔魚攝理韓宣子命斷舊獄罪在雍子雍子納

略具意

其女於叔魚叔魚蔽罪邢侯邢侯怒殺叔魚與雍子於朝宣子問其罪於叔向叔向曰三人同罪施生戮死可也雍子自知其罪而賂以買直鮒也鬻獄邢侯專殺其罪一也已惡而掠美為昏貪以敗官為墨殺人不忌為賊夏書曰昏墨賊殺臯陶之刑也請從之乃施邢侯而尸雍子與叔魚於市仲尼曰叔向古之遺直也治國制刑不隱於親三數叔魚之惡不為未減曰義也夫可謂直矣平丘之會數其賄也以寬衛國晉

不爲暴歸魯季孫稱其詐也以寬魯國晉不爲虐邢侯之獄言其貪也以正刑書晉不爲頗三言而除三惡加三利殺親益榮猶義也夫

十有五年春王正月吳子夷末卒

二月癸酉有事于武宮籥入叔弓卒去樂卒事

十五年春將禘于武公戒百官梓慎曰禘之日其有咎乎吾見赤黑之祲非祭祥也喪氛也其在蒞事乎二月癸酉禘叔弓蒞事籥入而卒去樂卒事禮也

夏蔡朝吳出奔鄭

楚費無極害朝吳之在蔡也欲去之乃謂之曰王唯信子故處子於蔡子亦長矣而在下位辱必求之吾助子請又謂其上之人曰王唯信吳故處諸蔡二三子莫之如也而在其上不亦難乎弗圖必及於難夏蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其爲人之異也吳在蔡蔡必速飛去吳所以翦

西語重三遍
檀弓每多此
等法亦自是
一種風調

春秋左傳

其翼也

六月丁巳朔日有食之

○六月乙丑王太子壽卒

○秋八月戊寅王穆后崩

秋晉荀吳帥師伐鮮虞

晉荀吳帥師伐鮮虞圍鼓鼓人或請以城叛穆子弗許左右曰師徒不勤而可以獲城何故不為穆子曰吾聞諸叔向曰好惡不愆民知所適事無不濟或以吾城叛吾所甚惡也人以城來

文機儘活但句法未新

事奇

又更益奇

率而燕似有數句可刪若但去賈怠二句猶為稍勁

吾獨何好焉賞所甚惡若所好何若其弗賞是失信也何以庇民力能則進否則退量力而行吾不可以欲城而邇姦所喪滋多使鼓人殺叛人而繕守備圍鼓三月鼓人或請降使其民見曰猶有食色姑脩而城軍吏曰獲城而弗取勤民而頓兵何以事君穆子曰吾以事君也獲一邑而教民怠將焉用邑邑以賈怠不如完舊賈怠無卒弃舊不祥鼓人能事其君吾亦能事吾君率義不爽好惡不愆城可獲而民知義所有

春秋左傳 昭公八年

死命而無二心不亦可乎鼓人告食竭力盡而後取之克鼓而反不戮一人以鼓子貳鞮歸

冬公如晉

冬公如晉平丘之會故也

○十二月晉荀躒如周葬穆后籍談為介既葬除喪以文伯宴樽向法以魯壺王曰伯氏諸侯皆有以鎮撫王室晉獨無有何也文伯揖籍談對曰諸侯之封也皆受明器於王室以鎮撫其社稷故能薦彝器於王晉居深山戎狄之與鄰而遠於

略具骨

王室王靈不及拜戎不暇其何以獻器王曰叔氏而忘諸乎叔父唐叔成王之母弟也其反無分乎密須之鼓與其大路文所以大蒐也闕鞞之甲武所以克商也唐叔受之以處參虛匡有戎狄其後襄之二路鉞鉞柅鬯彤弓虎賁文公受之以有南陽之田撫征東夏非分而何夫有勲而不廢有績而載奉之以土田撫之以彝器旌之以車服明之以文章子孫不忘所謂福也福祚之不登叔父焉在且昔而高祖孫伯鷹司

常語

常語

晉之典籍以為大政故曰籍氏及辛有之二子董之晉於是乎有董史女司典之後也何故忘之籍談不能對賓出王曰籍父其無後乎數典而忘其祖籍談歸以告叔向叔向曰王其不終乎吾聞之所樂必卒焉今王樂憂若卒以憂不可謂終王一歲而有三年之喪二焉於是乎以喪賓宴又求彝器樂憂甚矣且非禮也彝器之來嘉功之由非由喪也三年之喪雖貴遂服禮也王雖弗遂宴樂以早亦非禮也禮王之大經

未鍊鈔

也一動而失二禮無大經矣言以考典典以志經忘經而多言舉典將焉用之

十有六年

○十六年春王正月公在晉晉人止公不書諱之也

春齊侯伐徐

齊侯伐徐

楚子誘戎蠻子殺之

楚子聞蠻氏之亂也與蠻子之無質也使然丹

誘戎蠻子嘉殺之遂取蠻氏既而復立其子焉
禮也

○二月丙申齊師至于蒲隧徐人行成徐子及邾
人莒人會齊侯盟于蒲隧賂以甲父之鼎叔孫
昭子曰諸侯之無伯害哉齊君之無道也興師
而伐遠方會之有成而還莫之亢也無伯也夫
詩曰宗周既滅靡所止戾正大夫離居莫知我
肄其是之謂乎

○三月晉韓起聘于鄭鄭伯享之子產戒曰苟有

境

不甚淨然氣
却勁

位於朝無有不共恪孔張後至立於客閒執政
禦之適客後又禦之適縣閒客從而笑之事畢
富子諫曰夫大國之人不可不慎也幾為之笑
而不陵我我皆有禮夫猶鄙我國而無禮何以
求榮孔張失位吾子之恥也子產怒曰發命之
不衷出令之不信刑之頗類獄之放紛會朝之
不敬使命之不聽取陵於大國罷民而無功罪
及而弗知僑之恥也孔張君之昆孫子孔之後
也執政之嗣也為嗣大夫承命以使周於諸侯

國人所尊諸侯所知立於朝而祀於家有祿於國有賦於軍喪祭有職受脤歸脤其祭在廟已有著位在位數世世守其業而忘其所僑焉得恥之辟邪之人而皆及執政是先王無刑罰也子寧以他規我宣子有環其一在鄭商宣子謁諸鄭伯子產弗與曰非官府之守器也寡君不知子大叔子羽謂子產曰韓子亦無幾求晉國亦未可以貳晉國韓子不可偷也若屬有讒人交鬪其間鬼神而助之以興其凶怒悔之何及

大體語

點破主意

兩僑聞法新調甚古峭

泛論

實指事

申斷意

又深一層

六層意若肆口而出然構法却緊切嚴密

吾子何愛於一環其以取憎於大國也盍求而與之子產曰吾非偷晉而有二心將終事之是以弗與忠信故也僑聞君子非無賄之難立而無令名之患僑聞為國非不能事大字小之難無禮以定其位之患夫大國之人令於小國而皆獲其求將何以給之一共一否為罪滋大大國之求無禮以斥之何饜之有吾且為鄙邑則失位矣若韓子奉命以使而求玉焉貪淫甚矣獨非罪乎出一玉以起二罪吾又失位韓子成

餘波

商人六奇

一直說下只以盟誓為據與展喜對齊侯同法此更難為辭至此似更無得說却乃愈出嚴辭使人閉口不敢強索真是文之奇珍讀來覺層層有色白之有

味大抵文意奇則辭易工即前段意作餘波

與享趙孟章同調

春秋左傳

貪將焉用之且吾以玉賈罪不亦銳乎韓子買諸賈人既成賈矣商人曰必告君大夫韓子請諸子產曰日起請夫環執政弗義弗敢復也今買諸商人商人曰必以聞敢以為請子產對曰昔我先君桓公與商人皆出自周庸次比耦以艾殺此地斬之蓬蒿藜藿而共處之世有盟誓以相信也曰爾無我叛我無強賈毋或勾奪爾有利市寶賄我勿與知恃此質誓故能相保以至于今今吾子以好來辱而謂敝邑強奪商人

是教敝邑背盟誓也毋乃不可乎吾子得玉而失諸侯必不為也若大國令而共無藝鄭鄙邑也亦弗為也僑若獻玉不知所成敢私布之韓子辭玉曰起不敏敢求玉以徼二罪敢辭之夏四月鄭六卿餞宣子於郊宣子曰三君子請皆賦起亦以知鄭志子齏賦野有蔓草宣子曰孺子善哉吾有望矣子產賦鄭之羔裘宣子曰起不堪也子大叔賦褰裳宣子曰起在此敢勤子至於他人乎子大叔拜宣子曰善哉子之言是

春秋左傳

昭公中

三詩無答却
以總答六詩
意收法自圓

不有是事其能終乎子游賦風雨子旗賦有女
同車子柳賦稗兮宣子喜曰鄭其庶乎二三君
子以君命貺起賦不出鄭志皆昵燕好也二三
君子數世之主也可以無懼矣宣子皆獻馬焉
而賦我將子產拜使五卿皆拜曰吾子靖亂敢
不拜德宣子私覲於子產以玉與馬曰子命起
舍夫玉是賜我玉而免吾死也敢不藉手以拜

夏公至自晉

公至自晉子服昭伯語季平子曰晉之公室其

將遂卑矣君幼弱六卿彊而奢傲將因是以習
習實為常能無卑乎平子曰爾幼惡識國

秋八月己亥晉侯夷卒

秋八月晉昭公卒

九月大雩

九月大雩旱也

○鄭大旱使屠擊祝款豎柎有事於桑山斬其木
不雨子產曰有事于山藝山林也而斬其木其
罪大矣奪之官邑

季孫意如如晉冬十月葬晉昭公

冬十月季平子如晉葬昭公平子曰子服回之言猶信子服氏有子哉

十有七年春小邾子來朝

十七年春小邾穆公來朝公與之燕季平子賦采菽穆公賦菁菁者莪昭子曰不有以國其能久乎

夏六月甲戌朔日有食之

夏六月甲戌朔日有食之祝史請所用幣昭子

曰日有食之天子不舉伐鼓於社諸侯用幣於社伐鼓於朝禮也平子禦之曰止也唯正月朔慝未作日有食之於是乎有伐鼓用幣禮也其餘則否大史曰在此月也日過分而未至三辰有災於是乎百官降物君不舉辟移時樂奏鼓祝用幣史用辭故夏書曰辰不集于房瞽奏鼓嗇夫馳庶人走此月朔之謂也當夏四月謂之孟夏平子弗從昭子退曰夫子將有異志不君君矣

秋郊子來朝

秋郊子來朝公與之宴昭子問焉曰少皞氏鳥名官何故也郊子曰吾祖也我知之昔者黃帝氏以雲紀故為雲師而雲名炎帝氏以火紀故為火師而火名共工氏以水紀故為水師而水名大皞氏以龍紀故為龍師而龍名我高祖少皞摯之立也鳳鳥適至故紀於鳥為鳥師而鳥名鳳鳥氏歷正也玄鳥氏司分者也伯趙氏司至者也青鳥氏司啟者也丹鳳氏司閉者也祝

鳩氏司徒也鷓鳩氏司馬也鷓鳩氏司空也爽鳩氏司寇也鷓鳩氏司事也五鳩鳩民者也五雉為五工正利器用正度量夷民者也九扈為九農正扈民無淫者也自顓頊以來不能紀遠乃紀於近為民師而命以民事則不能故也仲尼聞之見於郊子而學之既而告人曰吾聞之天子失官學在四夷猶信

八月晉荀吳帥師滅陸渾之戎

晉侯使屠蒯如周請有事於雒與三塗萇弘謂

劉子曰客容猛非祭也其伐戎乎陸渾氏甚睦於楚必是故也君其備之乃警戎備九月丁卯晉荀吳帥師涉自棘津使祭史先用牲于雒陸渾人弗知師從之庚午遂滅陸渾數之以其貳於楚也陸渾子奔楚其衆奔甘鹿周大獲宣子夢文公攜荀吳而授之陸渾故使穆子帥師獻俘于文宮

冬有星孛于大辰

冬有星孛于大辰西及漢申須曰彗所以除舊

一事兩人說略一詳自

是構法前略是先驅後略是餘波

布新也天事恒象今除於火火出必布焉諸侯其有火災乎梓慎曰往年吾見之是其徵也火出而見今茲火出而章必火入而伏其居火也久矣其與不然乎火出於夏為三月於商為四月於周為五月夏數得天若火作其四國當之在宋衛陳鄭乎宋大辰之虛也陳大皞之虛也鄭祝融之虛也皆火房也星孛及漢漢水祥也衛顛頊之虛也故為帝丘其星為大水水火之壯也其以丙子若壬午作乎水火所以合也若

火入而伏必以壬午不過其見之月鄭裨竈言於子產曰宋衛陳鄭將同日火若我用瓘學玉瓚鄭必不火子產弗與

楚人及吳戰于長岸

吳伐楚陽句為令尹卜戰不吉司馬子魚曰我得上流何故不吉且楚故司馬令龜我請改卜令曰魴也以其屬死之楚師繼之尚大克之吉戰于長岸子魚先死楚師繼之大敗吳師獲其乘舟餘皇使隨人與後至者守之環而塹之及

叙奪船事有境

泉盈其隧炭陳以待命吳公子光請於其眾曰喪先王之乘舟豈唯光之罪眾亦有焉請藉取之以救死眾許之使長鬣者三人潛伏於舟側曰我呼餘皇則對師夜從之三呼皆迭對楚人從而殺之楚師亂吳人大敗之取餘皇以歸

十有八年

○十八年春王二月乙卯周毛得殺毛伯過而代之萇弘曰毛得必亡是昆吾稔之日也侈故之以而毛得以濟侈於王都不亡何待

已見前魯故之以其實當云以魯之故方是

春秋左傳

春王三月曹伯須卒

三月曹平公卒

夏五月壬午宋衛陳鄭災

夏五月火始昏見丙子風梓慎曰是謂融風火之始也七日其火作乎戊寅風甚壬午大甚宋衛陳鄭皆火梓慎登大庭氏之庫以望之曰宋衛陳鄭也數日皆來告火裨竈曰不用吾言鄭又將火鄭人請用之子產不可子大叔曰寶以保民也若有火國幾亡可以救亡子何愛焉子

挿此一奇

叙火政與襄九年宋子罕同法而加添動有態宗廟府庫宮內里巷城內城外以次謹令

產曰天道遠人道邇非所及也何以知之竈焉知天道是亦多言矣豈不梗住或信遂不與亦不復火鄭之未災也里析告子產曰將有大祥民震動國幾亡吾身泯焉弗良及也國遷其可乎子產曰雖可吾不足以定遷矣及火里析死矣未葬子產使輿三十人遷其柩火作子產辭晉公子公孫于東門使司寇出新客禁舊客勿出於宮使子寬子上巡羣屏攝至于大宮使公孫登徙大龜使祝史徙主祔於周廟告于先君使府

春秋左傳 昭公中

春秋左傳
人庫人各傲其事商成公傲司宮出舊宮人寘
諸火所不及司馬司寇列居火道行火所燬城
下之人伍列登城明日使野司寇各保其徵郊
人助祝史除於國北禳火于玄冥回祿祈于四
鄘書焚室而寬其征與之材三日哭國不市使
行人告於諸侯宋衛皆如是陳不救火許不弔
災君子是以知陳許之先亡也

六月邾人入鄆

六月鄆人藉稻邾人襲鄆鄆人將閉門邾人羊

羅攝其首焉遂入之盡俘以歸鄆子曰余無歸
矣從帑於邾邾莊公反鄆夫人而舍其女

秋葬曹平公

秋葬曹平公往者見周原伯魯焉與之語不說
學歸以語閔子馬閔子馬曰周其亂乎夫必多
有是說而後及其大人大人患失而惑又曰可
以無學無學不害不害而不學則苟而可於是
乎下陵上替能無亂乎夫學殖也不學將落原
氏其亡乎

與十二年葬
除事同
兵行欲道濶
此六只是除
道現二道字
可見庭是寢
之庭庭小不
一日可畢過
三日以待子
產過耳

春秋左傳

○七月鄭子產為火故大為社祓禳於四方振除
火災禮也乃簡兵大蒐將為蒐除子大叔之廟
在道南其寢在道北其庭小過期三日使除徒
陳於道南廟北曰子產過女而命速除乃毀於
而鄉子產朝過而怒之除者南毀子產及衝使
從者止之曰毀於北方

○火之作也子產授兵登陴子大叔曰晉無乃討
乎子產曰吾聞之小國忘守則危況有災乎國
之不可小有備故也既晉之邊吏讓鄭曰鄭國

辭命

有災晉君大夫不敢寧居卜筮走望不愛牲玉
鄭之有災寡君之憂也今執事攔然授兵登陴
將以誰罪邊人恐懼不敢不告子產對曰若吾
子之言敝邑之災君之憂也敝邑失政天降之
災又懼讒慝之間謀之以啟貪人荐為敝邑不
利以重君之憂幸而不亡猶可說也不幸而亡
君雖憂之亦無及也鄭有他竟望走在晉既事
晉矣其敢有二心

冬許遷于白羽

春秋左傳 昭公中

心淨

兩語有態下
句尤隋

楚左尹王子勝言於楚子曰許於鄭仇敵也而居楚地以不禮於鄭晉鄭方睦鄭若伐許而晉助之楚喪地矣君盍遷許許不專於楚鄭方有令政許曰余舊國也鄭曰余俘邑也葉在楚國方城外之蔽也土不可易國不可小許不可俘讐不可啟君其圖之楚子說冬楚子使王子勝遷許於析實白羽

十有九年

○十九年春楚工尹赤遷陰于下陰令尹子瑕城

邲叔孫昭子曰楚不在諸侯矣其僅自完也以持其世而已

○楚子之在蔡也鄖陽封人之女奔之生大子建及即位使伍奢為之師費無極為少師無寵焉欲譖諸王曰建可室矣王為之聘於秦無極與逆勸王取之正月楚夫人羸氏至自秦

春宋公伐邾

鄆夫人宋向戌之女也故向寧請師二月宋公伐邾圍蟲三月取之乃盡歸鄆俘

夏五月戊辰許世子止弑其君買

夏許悼公瘞五月戊辰飲大子止之藥卒大子奔晉書曰弑其君君子曰盡心力以事君舍藥物可也

○邾人鄆人徐人會宋公乙亥同盟于蟲

巳卯地震

○楚子為舟師以伐濮費無極言於楚子曰晉之伯也邇於諸夏而楚辟陋故弗能與爭若大城城父而寘大子焉以通北方王收南方是得天

下也王說從之故大子建居于城父令尹子瑕聘于秦拜夫人也

秋齊高發帥師伐莒

秋齊高發帥師伐莒莒子奔紀鄆使孫書伐之初莒有婦人莒子殺其夫已為嫠婦及老託於紀鄆紡焉以度而去之及師至則投諸外或獻諸子占子占使師夜緹而登登者六十人緹絕師鼓譟城上之人亦譟莒共公懼啟西門而出七月丙子齊師入紀

事奇

細

春秋左傳

冬葬許悼公

○是歲也鄭駟偃卒子游娶於晉大夫生絲弱其父兄立子瑕子產憎其爲人也且以爲不順弗許亦弗止駟氏聳他日絲以告其舅冬晉人使以幣如鄭問駟乞之立故駟氏懼駟乞欲逃子產弗遣請龜以卜亦弗予大夫謀對子產不待而對客曰鄭國不天寡君之二三臣札瘥天昏今又喪我先大夫偃其子幼弱其一二父兄懼隊宗主私族於謀而立長親寡君與其二三老

族於謀是倒字句與後室怒市色同

是自認過却乃憤其詞然實陰以拒晉用意絕妙

此自是正論

曰抑天實糾亂是吾何知焉諺曰無過亂門民有兵亂猶憚過之而況敢知天之所亂今大夫將問其故抑寡君實不敢知其誰實知之平丘之會君尋舊盟曰無或失職若寡君之二三臣其卽世者晉大夫而專制其位是晉之縣鄙也何國之爲辭客幣而報其使晉人舍之○楚人城州來沈尹戌曰楚人必敗昔吳滅州來子旗請伐之王曰吾未撫吾民今亦如之而城州來以挑吳能無敗乎侍者曰王施舍不倦息

春秋左傳 昭公中

民五年可謂撫之矣。戊曰：吾聞撫民者，節用於內而樹德於外，民樂其性而無寇讐。今宮室無量，民人日駭，勞罷死轉，忘寢與食，非撫之也。
○鄭大水，龍鬪于時門之外。洧淵，國人請為禳焉。子產弗許，曰：我鬪，龍不我覲也；龍鬪，我獨何覲焉。禳之則彼其室也，吾無求於龍，龍亦無求於我，乃止也。

倒字句附合
二句意附

○合尹子瑕言蹶由於楚。子曰：彼何罪？諺所謂室於怒，市於色者，楚之謂矣。舍前之忿可也，乃歸。

蹶由

二十年春王正月

○二十年春王二月己丑，日南至。梓慎望氛，曰：今茲宋有亂，國幾亡。三年而後弭，蔡有大喪，叔孫昭子曰：然則戴桓也。汰侈無禮已甚，亂所在也。○費無極言於楚子曰：建與伍奢將以方城之外叛，自以為猶宋鄭也。齊晉又交輔之，將以害楚，其事集矣。王信之，問伍奢。伍奢對曰：君一過多矣。何信於讒？王執伍奢，使城父司馬奮揚殺大

字句猶是左
氏而氣格略
覺變便近國
策史記

是左法收處
略不同

左本色

左文句多鍊
又常以物勢
出之是以每
饒婉巧之致
此章則多用
直法所以覺
不同

春秋左傳

子未至而使遣之三月大子建奔宋王召奮揚
奮揚使城父人執已以至王曰言出於余口入
於爾耳誰告建也對曰臣告之君王命臣曰事
建如事余臣不佞不能苟貳奉初以還不忍後
命故遣之既而悔之亦無及已王曰而敢來何
也對曰使而失命召而不來是再奸也逃無所
入王曰歸從政如他日無極曰奢之子材若在
吳必憂楚國益以免其父召之彼仁必來不然
將為患王使召之曰來吾免而父棠君尚謂其

兩句消其下
又似子書口
氣

左本色排而
不精

弟負曰爾適吳我將歸死吾知不逮我能死爾
能報聞免父之命不可以莫之奔也親戚為戮
不可以莫之報也奔死免父孝也度功而行仁
也擇任而往知也知死不辟勇也父不可弃名
不可廢爾其勉之相從為愈伍尚歸奢聞負不
來曰楚君大夫其盱食乎楚人皆殺之負如吳
言伐楚之利於州于公子光曰是宗為戮而欲
反其讐不可從也負曰彼將有他志余姑為之
求士而鄙以待之乃見縛設諸焉而耕於鄙

春秋左傳

昭公中

五十

夏曹公孫會自鄆出奔宋

○宋元公無信多私而惡華向華定華亥與向寧謀曰亡愈於死先諸華亥偽有疾以誘羣公子公子問之則執之夏六月丙申殺公子寅公子御戎公子朱公子固公孫援公孫丁拘向勝向行於其廩公如華氏請焉弗許遂劫之癸卯取大子欒與母弟辰公子地以為質公亦取華亥之子無惑向寧之子羅華定之子啟與華氏盟以為質

秋盜殺衛侯之兄縶

衛公子孟縶狎齊豹奪之司寇與鄆有役則反之無則取之公孟惡北宮喜褚師圃欲去之公子朝通于襄夫人宣姜懼而欲以作亂故齊豹北宮喜褚師圃公子朝作亂初齊豹見宗魯於公孟為驂乘焉將作亂而謂之曰公孟之不善子所知也勿與乘吾將殺之對曰吾由子事公孟子假吾名焉故不吾遠也雖其不善吾亦知之抑以利故不能去是吾過也今聞難而逃是僭

叙事入細

絕適勁

絕 西句意精

瑣記處堪書
以簡核妙

春秋左傳

子也。子行事乎。吾將死之。以周事子而歸。死於公孟其可也。丙辰，衛侯在平壽。公孟有事於蓋，獲之門外。齊子氏帷於門外而伏甲焉。使祝鼃寘戈於車薪以當門，使一乘從公孟以出，使華齊御。公孟宗魯驂乘，及閔中。齊氏用戈擊公孟，宗魯以背蔽之，斷肱。以中公孟之肩，皆殺之。公聞亂，乘驅自閔門入，慶比御。公公南楚驂乘，使華寅乘貳車，及公宮。鴻駟駟乘于公，公載寶以出。褚師子申遇公于馬路之衢，遂從。過齊氏

辭命燕叙
事

使華寅肉袒執蓋以當其闕。齊氏射公中，南楚之背。公遂出，寅閉郭門，踰而從。公公如死，鳥析朱鉏宵從，竇出徒行，從公。齊侯使公孫青聘于衛，既出，聞衛亂，使請所聘。公曰：猶在竟內，則衛君也。乃將事焉。遂從諸死鳥，請將事，辭曰：亡人，不佞，失守社稷，越在草莽，吾子無所辱。君命賓曰：寡君命下臣於朝，曰：阿下執事，臣不敢貳。主人曰：君若惠顧先君之好，照臨敝邑，鎮撫其社稷，則有宗祧在，乃止。衛侯固請見之，不獲命，以

春秋左傳 昭公中

其良馬見爲未致使故也。衛侯以爲乘馬，賓將
擷主人辭曰：亡人之憂，不可以及吾子。草莽之
中，不足以辱從者。敢辭。賓曰：寡君之下臣，君之
牧圉也。若不獲扞外役，是不有寡君也。臣懼不
免於戾，請以除死親執鐸，終夕與於燎。齊氏之
宰渠子召北宮子，北宮氏之宰不與聞，謀殺渠
子，遂伐齊氏，滅之。丁巳晦，公入，與北宮喜盟于
彭水之上。秋七月戊午朔，遂盟國人。八月辛亥，
公子朝褚師圃子玉霄子高魴出奔晉。閏月戊

辰，殺宣姜，衛侯賜北宮喜，諡曰貞子。賜析朱鉏
諡曰成子，而以齊氏之墓予之。衛侯告寧于齊，
且言子石。齊侯將飲酒，徧賜大夫曰：二三子之
教也。苑何忌辭曰：與於青之賞，必及於其罰，在
康誥曰：父子兄弟罪不相及。況在羣臣，臣敢貪
君賜。以于先王。琴張聞宗魯死，將往弔之。仲尼
曰：齊豹之盜，而孟縶之賊，女何弔焉？君子不食
姦，不受亂，不爲利疚於回，不以回待人，不蓋不
義，不犯非禮。

冬十月宋華亥向寧華定出奔陳

宋華向之亂公子城公孫忌樂舍司馬彊向宜向鄭楚建邕甲出奔鄭其徒與華氏戰于鬼閭敗子城子城適晉華亥與其妻必盟而食所質公子者而後食公與夫人每日必適華氏食公子而後歸華亥患之欲歸公子向寧曰唯不信故質其子若又歸之死無日矣公請於華費遂將攻華氏對曰臣不敢愛死無乃求去憂而滋長乎臣是以懼敢不聽命公曰子死亡有命余

不忍其詢冬十月公殺華向之質而攻之戊辰華向奔陳華登奔吳向寧欲殺大子華亥曰干君而出又殺其子其誰納我且歸之有庸使少司寇輕以歸曰子之齒長矣不能事人以三公子爲質必免公子旣入華輕將自門行公遽見之執其手曰余知而無罪也入復而所

十有一月辛卯蔡侯廬卒

○齊侯疥遂疢期而不瘳諸侯之賓問疾者多在梁丘據與裔款言於公曰吾事鬼神豐於先君

大論排而
實頗近風致

有。加。矣。今。君。疾。病。為。諸。侯。憂。是。祝。史。之。罪。也。諸。侯。不。知。其。謂。我。不。敬。君。益。誅。於。祝。固。史。嚚。以。辭。賓。公。說。告。晏。子。晏。子。曰。日。宋。之。盟。屈。建。問。范。會。之。德。於。趙。武。趙。武。曰。夫。子。之。家。事。治。言。於。晉。國。竭。情。無。私。其。祝。史。祭。祀。陳。信。不。愧。其。家。事。無。猜。其。祝。史。不。祈。建。以。語。康。王。康。王。曰。神。人。無。怨。宜。夫。子。之。光。輔。五。君。以。為。諸。侯。主。也。公。曰。據。與。款。謂。寡。人。能。事。鬼。神。故。欲。誅。於。祝。史。子。稱。是。語。何。故。對。曰。若。有。德。之。君。外。內。不。廢。上。下。無。怨。動。無。

其言入也字
下亦是倒句
法又即作住
法亦新第
調勢不流便
風韻不長
純是四字句
雖亦與鍊然
無條理分派
但覺堆垛重
滯

違。事。其。祝。史。薦。信。無。愧。心。矣。是。以。鬼。神。用。饗。國。受。其。福。祝。史。與。焉。其。所。以。蕃。祉。老。壽。者。為。信。君。使。也。其。言。忠。信。於。鬼。神。其。適。遇。淫。君。外。內。頗。邪。上。下。怨。疾。動。作。辟。違。從。欲。厭。私。高。臺。深。池。撞。鐘。舞。女。斬。刈。民。力。輸。掠。其。聚。以。成。其。違。不。恤。後。人。暴。虐。淫。從。肆。行。非。度。無。所。還。忌。不。思。謗。讟。不。憚。鬼。神。神。怒。民。痛。無。悛。於。心。其。祝。史。薦。信。是。言。罪。也。其。蓋。失。數。美。是。矯。誣。也。進。退。無。辭。則。虛。以。求。媚。是。以。鬼。神。不。饗。其。國。以。禍。之。祝。史。與。焉。所。以。

以詛反祝最切此叙處稍活動有致

天昏孤疾者為暴君使也其言僭慢於鬼神公曰然則若之何對曰不可為也山林之木衡鹿守之澤之萑蒲舟鮫守之藪之薪蒸虞侯守之海之鹽蜃祈望守之縣鄙之人入從其政偏介之關暴征其私承嗣大夫強易其賄布裳無藝徵斂無度宮室日更淫樂不違內寵之妾肆奪於市外寵之臣僭令於鄙私欲養求不給則應民人苦病夫婦皆詛祝有益也詛亦有損聊攝以東姑尤以西其為人也多矣雖其善祝豈能

勝億兆人之詛君若欲誅於祝史脩德而後可公說使有司寬政毀關去禁薄斂已責

○十二月齊侯田于沛招虞人以弓不進公使執之辭曰昔我先君之田也旃以招大夫弓以招士皮冠以招虞人臣不見皮冠故不敢進乃舍之仲尼曰守道不如守官君子韙之

○齊侯至自田晏子侍于遄臺子猶馳而造焉公曰唯據與我和夫晏子對曰據亦同也焉得為和公曰和與同異乎對曰異和如羹焉水火醯

注意好而詞未工

鍊法未盡

獨此四語佳

醢鹽梅以烹魚肉、燂之以薪、宰夫和之、齊之以味、濟其不及、以洩其過、君子食之、以平其心、君臣亦然、君所謂可而有否焉、臣獻其否、以成其可、君所謂否而有可焉、臣獻其可、以去其否、是以政平而不干、民無爭心、故詩曰、亦有和羹、既戒既平、饜嘏無言、時靡有爭、先王之濟五味、和五聲也、以平其心、成其政也、聲亦如味、一氣二體、三類四物、五聲六律、七音八風、九歌、以相成也、清濁、小大、短長、疾徐、哀樂、剛柔、遲速、高下、出

入、周疏以相濟也、君子聽之、以平其心、心平德和、故詩曰、德音不瑕、今據不然、君所謂可、據亦曰可、君所謂否、據亦曰否、若以水濟水、誰能食之、若琴瑟之專壹、誰能聽之、同之不可也、如是、飲酒樂、公曰、古而無死、其樂若何、晏子對曰、古而無死、則古之樂也、君何得焉、昔爽鳩氏始居此地、季荝因之、有逢伯陵因之、蒲姑氏因之、而後大公因之、古若無死、爽鳩氏之樂、非君所願也、

暢醒然文未腴

○鄭子產有疾謂子大叔曰我死子必爲政唯有德者能以寬服民其次莫如猛夫火烈民望而畏之故鮮死焉水懦弱民狎而翫之則多死焉故寬難疾數月而卒大叔爲政不忍猛而寬鄭國多盜取人於萑苻之澤大叔悔之曰吾早從夫子不及此興徒兵以攻萑苻之盜盡殺之盜少止仲尼曰善哉政寬則民慢慢則糾之以猛猛則民殘殘則施之以寬寬以濟猛猛以濟寬政是以和詩曰民亦勞止汔可小康惠此中國

以綏四方施之以寬也毋從詭隨以謹無良式遏寇虐慘不畏明糾之以猛也柔遠能邇以定我王平之以和也又曰不競不綌不剛不柔布政優優百祿是適和之至也及子產卒仲尼聞之出涕曰古之遺愛也

萬曆丙辰夏吳興閔齊華
閔齊伋閔象泰分次經傳

